


lwnh denjcz minzczunz noix Gvangjsih

Gij Cungjloih Sawgeq Sawcih Minzczunz Vunz Noix

Loih Beigaek



▲Mbaw yaenq bei doumoh Liuz Sw'gvanh.

Beigaek bingzciengz gangj dwg doengh cihsaw caeuq dozveh gaek youq gwnz rin. Beigaek youq Guengjsae gak dieg soqliengh lailang, daj neiyungz faenloih daihdaej miz bei coengdangz、bei ranzmiuh (miuhdauh)、bei mbanjbya、beisingz、beigyaiq、beiloh、bei goengdaek、bei gvidingh

ndaw mbanj、bei gauqseih、beimoh daengj. Gij beigaek Guengjsae bet gouj cingz doxhwnj dwg yungh Sawgun gaeksij, daihngleih dwg buenq Sawgun caeuq buenq Sawndip gaeksij, cienzboh aeu Sawndip gaek sij gig noix raen. Daengz seizneix Guengjsae raen miz daengx bien faenzcieng yungh cihsaw geq minzczunz sij haenx gig noix raen. Daengz seizneix Guengjsae raen miz sij beigaek daengx bien faenzcieng aeu cihsaw geq minzczunz gaeksij dwg《Bei Doumoh Liuz Sw'gvanh》. Gaiq bei neix youq seizneix Gvangjsih Hozciz Si Yizcouh Gih Anhmaj Yangh Gujyuz Cunh, Cinghdaugvangh Cib' it Bi (1831 nienz) seiq nyied cibgouj hauh laeb hwnj, dwg Cingdaih vunz Bouxcuengh Liuz Sw'gvanh lixyouq seiz vih swhgeij hwnjguh gij dou bei aenmoh, baihgwnz gaek Fwencuengh Sawndip 《Gij Faenzcieng Gag Danq》 swhgeij biensij, eiqsei dwg “gij fwen danqheiq seiqvunz”, daengx bien fwen gung 15 hot 120 baiz 600 cih, geiqloeg gij gingling ciuhvunz bouxcawj aenmoh, seizcoz gaenxguh ciengx ranz, hoeng ciuhvunz mbouj miz lwg、cungnieng seiz song boux lwgciengx gvaq giuz vut

dwngx deuz ok ranz bae、seizgeq mehyah dai bae boux vunz gadog, gangj ok swhgeij simndaenq siliengz, maqmuengh bouxlaeng gaej byaij roen gaeuq swhgeij mbouj roebdeng saeh boihseiz.

Loih Faenzsaw Mbawheiq

Faenzsaw mbawheiq dwg gij faenzsaw mbawceij sanqyieb geiqloeg gak minzczunz ndawbiengz ginghci swngghoz ndawde mizgven gaicawx、ciqciengz、codangq、gienzsug faen'gvej diegreih ranzyouq、ndoengbya、aensuen doengh gij caizcanj neix caeuq minzgevi minzsug gag miz haenx. Faenzsaw mbawheiq bingzciengz aeu Sawgun sij, mbanj noix aeu Sawndip geiqloeg gij cohvunz、cohdieg caeuq vahswz gag miz ndaw saw. Gij faenzsaw mbawheiq Guengjsae ciengzseiz raen haenx miz mbawheiq gaicawx reihnaz、mbawheiq gaicawx diegreih ndoengbya、mbawheiq gaicawx gomak、mbawheiq gaicawx diegranz、mbawheiq duh dangq cuengqcaiq、mbawgawq ciq (boiz)、mbaw saw (dan) faen'gven

(gya)、habdoengz hwnjcoemq geiq ciengx doengh gijneix. Faenzsaw mbawheiq doiq yenzgiu vwnzyenyoz、minzczuzyoz、ginghcyoz、seveiyoz、fazyoz、minzsuzyoz doengh aen yozgoh neix daezhawj baengzgaug ciuhgonq camgauj youqgaenj, ndaej dienzboh swhliu gwnz saw guenfueng geiqciengz mbouj gaeuq.

(Vangz Gyanghmyauz hoiz)



▲Faenzsaw mbawheiq.

Gij doz lanz neix dwg Swcigih Saujsu Minzczunz Gujcz Baujhu Yenzgiu Cunghsinh hawj.

Hawfwen Yizfungh Liujcouh:

Hawfwen Cien Bi Daizheiq Doxgiet

□Yangz Fangh

Hawfwen Yizfungh Liujcouh, dwg gij dijbauj Cunghvaz Minzczunz vwnzva. De rapdawz gvaq cien bi lizsij, cwkmom gij fwen ndei Bouxcuengh, baenz aen dieg gangjnaeuz Cunghvaz vwnzva lai cungj lai yiengh ndeiraeuh ndeu. Seizgan lae bae foedfoed, Hawfwen Yizfungh gaenq daj hainduj vunzbiengz gag comz daeuj doiq fwen, daengz seizneix hwnghfat baenz aen dieg comz cienzswnj vwnzva、langhbaij yisuz、gyaulouz gamjcingz ndeu.

Gij Daegdiemj Hawfwen Yizfungh

Lizsij gyaenanz. Vunz raeuz nyinhnaeuz, hawfwen ciq ceiz youq mwh Dangzdai gaenq miz lo, dwg vunz gak minzczunz Guengjsae youq ndaw gwndaenj guh' angq、dajndaem dajciengx cugciemh gag baenz cungj sibgvenq ndeu. Sungdai Couh Gifeih youq ndaw bonj 《Rog Lingj Lawh Dap》、Mingzdai Yoz Hozswng h youq ndaw bonj 《Bonj Laeng Geiq Gwih Fungh Bae》caeuq Ndawbi Genzlungz Cinghdai ndaw 《Liujcouh Fuj(Yen)ci》 cungj geiq sij vunz Guengjsae gyaenz doxcomz eufwen. Cinghdai 《Vah Moq Gvangjdung》《Lwnh Gvangjdung》《Aendaemz Baihbaek Seizbienh Lwnh》daengj vwnzyen, cungj geiqsij aen gojgaeq Liuz Sanhcej caeuq daegmbauq Bwzho doiqfwen baenz sien. Ndawbiengz riuz naeuz Liuz Sanhcej youq Byayizfungh gwih duzbya mbin hwnj mbwn baenz duzsien, ndigah, couh miz vunz comz daeuj neix eufwen, cugciemh baenz aen Hawfwen Yizfungh, laebdaeb cienz daengz seizneix.

Caez miz caez yungh. Daj ciuhgeq daeuj, vunz gak minzczunz Guengjsae caemh youq laj aen mbwn ndeu、caemh cae doengh naz ndeu、caemh gwn diuz dah ndeu、caemh cau dieg ranz ndeu, Hawfwen Yizfungh hix dwg vunz gak minzczunz caez miz caez yungh. 1963 nienz, Goz Mozyoz youq Liujcouh dingq ginzung doiqfwen le, sim' angq sij sei: “Byonghbya Yizfungh singfwen hwnj, wng dwg Sanhcej caiq daeuj moq. Gwih duz lungz bya mbin Giujcouh, biengz raeuz gizgiz dwg hawfwen.” Hawfwen Yizfungh ciucomz gyoengq canghfwen caeuq boux gyaenz eufwen gak minzczunz gak dieg daeuj, gyoengqde aeu fwen hoih youx、aeu fwen cienz cingz, mbelangh gij ndei gij ak Cunghvaz vwnzva. Hawfwen Yizfungh couh yienghneix yied ngoenz yied ndei, yied ngoenz yied okmingz, daengz seizneix cungj hawj vunzlai gig haengj de yawjnaek de.

Son vunz roxsoq. Daeuj Hawfwen Yizfungh cujyau dwg daeuj doiqfwen. Ndaw fwen miz gojgaeq lizsij、dauhleix guhvunz, gij neix doenggvaq eufwen ndaej daih cienz daih. Bouxcoz hag eufwen le, ndaej rox gij cihsiz caeuq dauhleix ndaw fwen.

Vatgud Gij Gyaciz Hawfwen Yizfungh

Vatgud gij dijbauj coengmingz de. Hawfwen Yizfungh naengh youq laj Byayizfungh, dieg ndeiyouq hab eufwen. Vunz gak minzczunz comz daeuj neix eufwen, ndaej baenz baengzyoux dox hagsib. Gij coenz fwen haenx dangq boux dangq doq, baij gij

coengmingz gyoengqde okdaeuj liuxnauq, gij fwen ndei riuz ciengq gyaenz'vangq, hawj vunzlai yied ciengq yied lumj dwg ranz vunz ndeu.

Vatgud gij vwnzva daej na de. Hawfwen Yizfungh mboujdan dwg dieg eufwen, engq dwg dieg miz vwnzva daej na ndeu. Gizneix caeuq dieg gaenhyawj de, riuz gij gojgaeq canghfwen Liuz Sanhcej daengj lairaeuh, gij gojgaeq neix mboujdanh hawj Hawfwen Yizfungh hamz miz vwnzva naekna, hix ce cingsaenz caizfouq hawj ciuhlaeng lai lai. Daj ciuhgonq roengzdaeuj, haujlai canghraiz canghsei、canghgaicawx daeuj neix, raiz faenzcieng raiz sei、guh gaicawx, ce haujlai sei faenz roengzdaeuj hawj ciuhlaeng, hawj aen haw neix hoenghraiex.

Vatgud gij fuengfap gaeuq moq yungzhab. Seizneix saenqsik gisuz hwnghfat hoenghhd, vulenzvangj、segyauh meizdij、bingzdaiz sibinz dinj daengj, ndaej youq gwnz vangj cigboq、faenyiengj sibinz dinj daengj, aeu ra gij fuengfap gaiq gaeuq caeuq gaiq moq yungzhab, hawj vwnzva Hawfwen Yizfungh yied riuz yied gyaenanz.

Doi Hawj Hawfwen Yizfungh Ndaej Hwnghfat Moq

Seizneix Hawfwen Yizfungh mboujdanh dwg dieg hawfwen ndeu, hix dwg dieg cienzboh Cunghvaz vwnzva ndeu. 2013 nienz, Hawfwen Yizfungh baenz aen hanghmoeg guhyiengh cauhaeb guekgia gunghung vwnzva fugsahv vunzlai. Daj neix hwnj, cwngfuj youq neix guh daengx guek eufwen doxdax, iucingj

canghfwen doihfwen daengx guek gak dieg daeuj neix doxdax eufwen. Aeu ciq gij hozdung neix doi hawj Cunghvaz vwnzva ndaej hwnghfat moq.

Aeu gyarengz laebguh aencang soqgawq. Soucomz caeuq cinggleix gij lizsij vwnzyen、yinhsieng swhliu、doxgaij Hawfwen Yizfungh, laeb dangjan caeuq aencang soqgawq, caemhcaiq leihyung soqcih gisuz bae baujcunz caeuq langhbaij de.

Aeu gyarengz ungganq aendoih vunzcaiz. Mbiengj he laeb aen gihci vwnzva hawfwen cienzswnj, ungganq boux cienzswnj, gingciengz guh beizyin; lingh mbiengj aeu yungh ndei “muengxhoengz”, yungh gyoengqde doigvangq vwnzva hawfwen, lwnghangj dangdieg lijyouz swhyenz, coi hawj vwnzva caeuq lijyouz yungzhab hwnghfat.

Aeu gyarengz leihyung vwnzva cau' ok gij doxgaiq gyoengqvunz gyaenz yungh haenx. Naemjnaemj seizneix gyoengqvunz haengj yungh gijmaz, cau' ok gij doxgaiq miz gij daegdiemj Hawfwen Yizfungh ndeiraeuh youh habyung haenx.

Hawfwen Yizfungh ndawbiengz gag baenz、youq ndawbiengz hoenghfat、fugsahv vunzbiengz, vunz gak minzczunz cungj gig maij de, doiq doidoengh Cunghvaz vwnzva cienzswnj hwnghfat、coihawj gak minzczunz dox baedauq dox gyaulouz dox yungzhab miz cozyung youqgaenj. Aeu henhoh yungh ndei gaiq vwnzva swhyenz neix, dawz Hawfwen Yizfungh guh baenz aen vwnzva binjbaiz okmingz、gyoengqvunz gyaenz bae youzlangh ndeu.